

Cuera vul negina scoletta bilingua

L'Uniun scolina rumantscha e la Lia Rumantscha ein desillusiunadas dalla decisiun dil cussegl dil marcau

DAD ANDREAS CADONAU

■ Il cussegl dil marcau da Cuera vul negina scoletta romontsch/tudestga e consequentamein era buc ina talian/tudestga. Suonda il cussegl communal la proposta dil cussegl dil marcau ei la scolina rumantscha historia. La frustraziun ei buca pintga. En scadin cass tier la Lia Rumantscha e tier l'Uniun purtadra dalla scolina rumantscha a Cuera. *Martin Mathiuet*, responsabels tier la Lia Rumantscha per la sparta scolaziun, ei desillusiunada dalla decisiun dil cussegl dil marcau da Cuera da proponer al cussegl communal da desister dad ina scoletta bilingua. Tonpli surstaus ei *Martin Mathiuet* dallas decisiun suenter las liungas tractativas cun il marcau en caussa. Che la Lia Rumantscha sezza ei buca pli habla da garantir la scolina rumantscha a Cuera stat, tenor *Martin Mathiuet*, en connex cun la situaziun finanziaria desolata dalla Lia Rumantscha. Il responsabel per la scolaziun ha dau da ponderar che las contribuziuns alla Lia seigien dapi passa dus decennis restadas sil medem level e buca vegnidas adattadas alla carischia. Ils cuosts perencuter creschien cuntinuadamein. Il temps da viver dallas reservas mondi da rendiu. Consequentamein stoppi la Lia restrenscher sias activitads. Ella hagi gia dagitg annunziou da buca pli saver finanzia il menaschi dalla scoletta romontscha a Cuera e seigi entrada en contractivas cun il marcau. Sin fundament da quellas contractivas hagi ins spetgau in gie dil cussegl en caussa.

L'Uniun scolina rumantscha tschontscha dad in affrunt

Pauc plascher dalla decisiun dil cussegl dil marcau ha era il president dall'uniun



La porschida romontscha per ils scolarets da Cuera ei periclitada.

KEYSTONE

putradra dalla scolina, *Ernst Bromeis*. El ha menziunau ina scuntrada igl onn passau denter ils geniturs dils affons dalla scoletta, la Lia Rumantscha ed il menader dallas scolas dil marcau, *Gion Caviezel*. Ina scuntrada che hagi manteniui la speranza da saver introducir la scoletta bilingua pil proxim onn da scola. «La decisiun negativa ei in affrunt viers tut ils geniturs e lur affons.» Breigia ha il president dall'uniun purtadra era d'acceptar ils motivs finansials fatgs valer per sbittar la scoletta bilingua. Motivs purtai dil

cussegl dil marcau da Cuera. *Ernst Bromeis* ei digl avis ch'ils cuosts effectivs dad ina porschida bilingua seigien numadamein mudests en vesta als avantatgs dad ina promoziun plurilingua. *Ernst Bromeis* ha annunziou da sefatschentar da cuminonza cun la suprazonza dall'uniun purtadra proximamein cun la situaziun e decider davart las mesiras per intimar il cussegl communal dil marcau da prender in'otra decisiun. Per *Ernst Bromeis* ei la decisiun dil marcau da Cuera era in affrunt viers la populaziun

taliana sesenta el marcau. Ella havess era pudiu profitar dad ina scoletta bilingua. «Il cussegl dil marcau ei buca pertschats dalla valur dalla plurilinguitad ella formaziun.» Ina decisiun negativa dil cussegl communal dil marcau en caussa liquidescha definitiv la porschida romontscha sil scalem dalla scoletta el marcau da Cuera.

La Pro Grigioni Italiano ei buca stada involvada

Il secretari general dalla Pro Grigioni Ita-

liano, *Giuseppe Falbo*, ei buca staus informaus detagliadamein davart la problematica dalla scolina rumantscha e las perspectivs per ina scoletta talian/tudestga. El ha bein tradiu da haver giu contact en caussa cun il menader dallas scolas da Cuera, *Gion Caviezel*, e cun il secretari dalla Lia Rumantscha, *Urs Cadruvi*. Il secretari general ha visau ad autras activitads en direziun istruzium bilingua. *Giuseppe Falbo* ha fatg attent ad ina interpellaziun dalla cussegliera nazionala, *Kathy Riklin*, el parlament a Berna. Ina interpellaziun che pretenda principalmein per las minoritads romontschas e talianas la pusseviltad d'istruzione ordeifer lur territori tradiziunals. Quei conform alla resoluziun dil cussegl d'Europa digl onn 2003 ed en vesta digl artechel 2 dalla lescha da lungatgs federala. L'interpellaziun datescha dils 11 da december digl onn passau e *Giuseppe Falbo* ha explicau che la PGI hagi contribuui en caussa.

La decisiun finala arisguard la scoletta bilingua pren il cussegl communal dil marcau en circa duas jannas. La cussegliera e representanta dalla pld en quei gremi, *Chantal Marti*, ha annunziou sin damonda da buca haver enconuschientschas detagliadas davart ils motivs che hagian intaimu il cussegl dil marcau a sia decisiun. Tenor l'opziun dalla cussegliera communal fussi ina scoletta bilingua impurtonta analog alla porschida semgionta existenta el scalem primar dalla scola dil marcau. Dalla responsabladad viers la promoziun romontscha e visavi las famiglias romontschas da Cuera stuessi il marcau buca sedistanziar. Tuttavia seigi ella denton era digl avis che la Lia Rumantscha stoppi contribuir sia part.

FLEM

Chasa da tgira Plaids duai vegnir engrondida

(rtr) La chasa da tgira Plaids a Flem saja memia pitschna. Perquai duai ella vegnir engrondida da 33 sin 46 letgs. Quai tenor *Erwin Jäger*, il president da la Fundaziun Chasa da tgira Plaids. In bajetg annex cun 20 letgs ed ina staziun per pazients cun demenza saja previs. Per il project cun in preventiv da passa 10 milliuns francs dettia quai ina concorrenza d'architettura. Projects san anc vegnir inoltrads fin mez da favrer. Il zercladur decida ina giuria tge project che vegn realisà. L'emprima badiagliada è planisada igl avrigl 2011.

ARTG PERSUNAL

Gratulaziuns en Casa Val Lumnezia: A caschun da nosa sera da persunal, ils 15-01-2010 a Morissen, ein suandonts collaboraturs vegni honorai:

Per il giubileum da 10 onns el Da casa Val Lumnezia: *Ursulina Casaulta* da Lumbrin; *Yvonne Casanova* da Degen; *Rita Casanova* da Vignogn; *Giuditta Caminada* da Vattiz; *Rosina Caduff* da Vattiz.

Per il giubileum da 15 onns el Da casa Val Lumnezia: *Gerhard Collenberg* da Morissen; *Bozinka Montalva* da Morissen; *Otti Furger* da Cumbel; *Clementina Coray* da Glion; *Claudina Casanova* da Vignogn.

In special engraziament admetta la cummissiun da menaschi al meinacasa parent, *Rest Martin Caduff* da Morissen. Dapi varga 16 onns ha el luvrau sco administratur, resp. meinacasa al tgamun dil Da casa Val Lumnezia cun engaschament exemplaric. Rest *Martin Caduff* s'engascha vinavon per il Da casa Val Lumnezia en sia incumbensa sco meinaproject dil baghetg niev a Davos Cuort, Vella.

En num da habitontAs e collaboratursAs gratulein nus cordialmein als giubilers ed engraziain per lur engaschi.

20 onns Musica giuvenila Lumnezia

■ Ils 23 da schaner 2010 festivescha la Musica giuvenila Lumnezia siu 20avel onn. Quei giubileum sa la musica festivar ensemen cun la Gruppa da tamburs Lumnezia e la Musica giuvenila da Jenaz. La finamira dalla musica giuvenila ei da dar a mintga giuvenil la pusseviltad d'emprender da sunar in instrument da stuors e da sunar en ina musica. Aschia vegnan las musicantas ed ils musicants preparai per sunar en ina musica dil vitg.

Igl onn 1990 ei *Robert Casanova* da Vignogn semess en contact cun ils dirigents dallas societads da musica en Lumnezia per fundar ina musica giuvenila. Igl εμπrem da zercladur 1990 eis ei stau aschi lunsch. Enteifer cuort temps dumbrava la musica giuvenila gia 60 commembras e commembres.

Per la preparaziun pil concert annual, che ha liug mintgamai la fin schaner, ha la musica fatg entgins camps da musica en differents loghens ils davos 20 onns. Igl onn 1993 ei la musica giuvenila stada treis dis a Näfels, igl onn 1995 treis dis a Sedrun ed igl onn 1997 treis dis a Lai/Lenzerheide. 11 onns suenter la fundaziun ha la musica astgau presentar ina nova mundura. Ei ha dau novs libroc e novas tschittas. Igl onn 2000 ha la musica giuvenila giu la pusseviltad da registrar in dc cun treis marschs dil Grischnun.

La musica giuvenila ha gia saviu festivar differents success. Igl onn 1994 alla Fiasta cantunala dil cantun Glaruna. 1995 ha la musica priu part dalla Fiasta da musica districtuala a Val s. Pieder. Il pli grond success ei stau igl εμπrem plaz

ella quarta categoria alla Fiasta da musica federala igl onn 2006 a Lucerna. Plinavon pren la musica part da differents occurrenz. Mintg'auter onn fa la musica in viadi da viagar a pei ni in viadi pli grond. Ils davos onns havein nus fatg suandonts viadis: Camona dil Terri, camona da Medel, camona dalla Lanta, viadi egl Europa-Park a Rust, viadi al Lag da Garda ed il viadi a Minca.

La finamira principala dalla musica giuvenila ei il concert annual che ha liug la fin schaner. Sco preparaziun per il concert fa la musica circa 20 entochen 25 exerchezis e dus camps durant la sesiun. La musica sa esser loscha da haver aschi biars e motivai musicants che fan musica.

Il president Remo Caminada

Il concert d'uonn ha liug ils 23 da schaner 2009 a Vignogn en la Sentupada allas 20.00.



Ils commembres dalla musica giuvenila Lumnezia ein promts per lur concert annual 2010.

MAD

Podi davart la politica da scola

■ (cp) Gievgia, ils 28 da schaner 2010 a las 20.00 ha lieu en l'aula Plessur da la Scola chantunala a Cuera in podi public davart il tema: «Politica da scola». A sa preschentar tar quella occurrenza vegnan ils novs candidats per la regenza: *Heinz Brand* (pps); *Christian Brosi* (senza partida); *Barla Cabannes* (pcd); *Martin Jäger* (ps) e *Jürg Kappeler* (pvl). Moderà vegn il discurs al podi tras *Christian Buxhofer*, scheffedactur dal «Bündner Tagblatt». Quest inscunter vegn organisà da la gruppa regionala grischuna da l'Uniun da geniturs per uffants fitg talentads.

MUSTÉR

Emprem bal dalla scola

(anr) Sonda proxima, ils 23 da schaner 2010 organischa la scola claustrala igl εμπrem bal da quella per carschi. Responsablas persunter ein las scolaras dil gimnasi. Avon in onn ha *Geneviève Appenzeller-Combe* surpriu sco emprema dunna il rectorat dalla Scola claustrala a Mustér. A caschun da sia introduziun han scolaras e scolars dalla scola claustrala astgau far propostas per projects da reclama per la scola. Ina da quellas – e che ha fatg surstar buca pauc – ei stau dad organisar in bal dalla scola claustrala, ni in sault d'unviern. Ton ina giuria da scolaras sco scolars, ed era scolasts e scolastas, ha cattau quella idea per buna che vegn ussa realisada.

Liug ha il bal sonda proxima naven dallas 20.00 ella sala Fontauna el center da sport a Mustér. La presentaziun succeda tras maturandas da quest onn. A cooperar vegn era la Live Band Clamür ed ei dat in grond buffet. La prevendita procura Sedrun Mustér Turissem, tel. 081 920 40 30.